

दिनांक 17.10.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- राष्ट्रपति द्रौपदी मुर्मू कह्यो-आदि कर्मयोगी अभियान ऊं हर आदिवासी गांव ने खुद रे पाण ऊबो क्यो जावेलं
- बारां जिला री अंता विधानसभा सीट माथे उपचुनाव सारू भारतीय जनता पार्टी मोरपाल सुमन ने उम्मीदवार बणायों
- मुख्यमंत्री भजनलाल शर्मा रो काल नदबई ऊं मुख्यमंत्री किसान सम्मान निधि री चौथी किश्त जारी करण रो कार्यक्रमं
- पांच दिन रो दीवाळी रो त्यौहार काल सरू व्हेलां

000

राष्ट्रपति द्रौपदी मुर्मू कह्यो है के जनजातीय समुदाय भारतीय संस्कृति रो अटूट हिस्सो है अर जनजातीय रिवाज विकास ने कुदरत सागे जोड़े हैं वे आज नई दिल्ली मांय आदि कर्मयोगी अभियान रा बारा मांय राख्यी ज्या राष्ट्रीय सम्मेलन मांय बोल रही हैं राष्ट्रपति कह्यो के आजादी पाछे सरकार आदिवासी समुदाय माथे ध्यान नी दीनो, पण अब ई हलका मांय सरकार चोखी कोशिशं कर रही हैं श्रीमती मुर्मू कह्यो के देश रा विकास मांय जनजाति समुदाय री भागीदारी ऊं देश और आगे बधेलां वे सगळा ऊं आदिवासी समुदाय ने सागे ले र चालण री अपील कीनीं

.....

सम्मेलन मांय राष्ट्रपति आदि कर्मयोगी अभियान ऊं जुड़्या चोखा काम करण वाळां रो मान कीनीं आं मांय भीलवाडा रा जिला कलेक्टर जसमीत सिंह संधु ई शामिल हैं सम्मेलन रे दौरान, शिक्षा अर कौशल विकास, स्वास्थ्य अर पोषण, आजीविका अर उद्यमिता, बुनियादी ढांचा अर शासन अर संस्थागत मजबूती समेत न्यारा-न्यारा हलकां रा बारा मांय विचार क्यो जा रह्यो हैं

000

बारां जिला री अंता विधानसभा सीट रा उपचुनाव सारू हाल ताई 11 पर्चा दाखिल क्यो जा चुक्या हैं नामपाना 21 अक्टूबर ताई भर्या जा सके हैं ई बीचे भारतीय जनता पार्टी ई सीट माथे उपचुनाव सारू बारां पंचायत समिति रा प्रधान मोरपाल सुमन ने उम्मीदवार बणायो हैं उपचुनाव मांय कांग्रेस प्रमोद जैन ने खड़ा कीना हैं ई बीचे भारतीय जनता पार्टी चुनाव प्रचार सारू 40 स्टार प्रचारकां री लिस्ट जारी कर दीनी हैं मुख्यमंत्री भजनलाल शर्मा, भाजपा रा प्रदेश अध्यक्ष मदन राठौड़ अर राज्य री पैली वाळी मुख्यमंत्री वसुंधरा राजे समेत पार्टी रा केई नेतावां रा नाम ई लिस्ट मांय शामिल हैं

000

रक्षामंत्री राजनाथ सिंह हिन्दुस्तान एयरोनॉटिक्स लिमिटेड री नासिक उत्पादन इकाई मांय बण्या पहला तेजस लाइट कॉम्बेट एयरक्राफ्ट एम.के. वन ए रो अनावरण कीनीं ई मौके वे सिखावण देवण वाळा जहाज एचटीटी-40 बणावण रा कारखाना रो ई उद्घाटन कीनीं रक्षा मंत्री नासिक डिविजन मांय

बनायी ज्या सुखोई-30, एलसीए अर एचटीटी-40 लड़ाकू जहाज़ों की सराहवणा करता थाकां कह्यो के आं री उड़ान रक्षा हलका मांय खुद रे पाण ऊबा व्हेवण री उड़ान हैं

.....

000

खाद्य अर नागरिक आपूर्ति विभाग, "गिवअप" अभियान रा तैत खाद्य सुरक्षा योजना रा पात्र लोगों री लिस्ट ऊं मर्जी ऊं नाम हटावण री आखिरी तारीख 31 अक्टूबर ताई बधा दीनी हैं 1 लाख रुपया या बत्ती सालाना आमदनी या पेंशन लेवण वाळा सरकारी कर्मचारी या चौपहिया गाड़िया राखण वाळा ई योजना ऊं नाम पाछा ले सके हैं 31 अक्टूबर पाछे खाद्य सुरक्षा योजना रो फायदो लेता पकड़या जावण वाळा अपात्र लोगों ऊं ई योजना रा तैत हासिल करी ज्या अन्न रा मोल री वसूली करी जावेलां

000

स्वायत्त शासन मंत्री झाबर सिंह खर्चा आज चूरू मांय लगायी ज्या शहरी सेवा शिविर रो दौरों कीनीं ई मौके वे कह्यो के जनता रा सुबीता ने ध्यान राखता थाकां आं शिविरां री अवधि और बधायी जावेलां ई दौरान वे जनता ने पट्टा बांटया अर प्रधानमंत्री आवास योजना रा तैत पहली किश्त री रकम ई दीनीं

000

मुख्यमंत्री भजनलाल शर्मा रो काल भरतपुर जिला रा नदबई ऊं मुख्यमंत्री किसान सम्मान निधि री चौथी किश्त रा 7 अरब 17 करोड़ रुपया किसानां रा खातां मांय भेजण रो कार्यक्रम हैं सहकारिता मंत्री गौतम कुमार दक आ जाणकारी दीनीं वे बतायो के प्रदेश मांय 30 जून 2024 ऊं लागू करी ज्यी ई योजना रा तैत दी जावण वाळी सालाना रकम 6 हजार ऊं बधा र 8 हजार अर चालू माली साल मांय 9 हजार रुपया सालाना कर दीरीजी हैं राज्य मांय हाल ताई 71 लाख 79 हजार किसानां ने इण रो फायदो मिल चुक्यो हैं

000

जैसलमेर मांय एक बस मांय लाय लागण रा वाकया पाछे परिवहन विभाग पूरा प्रदेश मांय अभियान चला र हाल ताई 1 हजार 700 ऊं बत्ती ए.सी. अर दूजी स्लीपर बसां री जांच कीनीं हैं अतिरिक्त परिवहन आयुक्त ओ.पी. बुनकर आकाशवाणी ने आ जाणकारी दीनीं वे बतायो के आवता बगत मांय ऐड़ा हादसा रोकण सारु सगळा ज़रूरी जतन कर्या जा रह्या हैं

.....

श्री बुनकर बस मालिकां ऊं सुरक्षा मानकां री पालना करण री अपील कीनीं ई बीचे जैसलमेर मांय लारला दिनां एक बस मांय लाय जागण रे कारण घणा झुलस्या लोगों रो जोधपुर रा महात्मा गांधी अस्पताल मांय ईलाज चाल रह्यो हैं अस्पताल रा अधीक्षक फतेह सिंह भाटी बतायो के आज एक और जणा री मौत व्हे गयीं ई पाछे बस मांय लाय लागण रा हादसा रे कारण मरण वाळां री तादाद 23 व्हे गयी हैं अस्पताल रा अधीक्षक बतायो के बस हादसा मांय ज़ख्मी व्ह्या 13 और लोग ई सफाखाना मांय भर्ती हैं, ज्यां मांय ऊं 8 जणां री हालत नाजुक हैं

000

दीवाळी रो पांच दिन रो त्यौहार काल धनतेरस ऊं सरु व्हेलां धनतेरस रे मौके सोना-चांदी रा सिक्का, गहणा अर बर्तन री खरीदी री रीत हैं ई रा आगला दिन रूप चौदस यानि छोटी दीवाळी मनाई जावेलां ई दिन महिलावां रे सजबा-संवरबा री रीत हैं ई पाछे अमावस 20 अर 21 अक्टूबर ने दो दिन रेहवण रे कारण न्यारी-न्यारी ठोडां लक्ष्मी पूजन सोमवार अर मंगलवार ने कर्यो जावेलां 22 अक्टूबर ने गोवर्धन अर अन्नकूट मणायो जावेला, जदके 23 अक्टूबर ने भाईदूज सागे दीवाळी रो त्यौहार पूरो व्हेलां दीवाळी रे मौके बाजारां, दुकानां, घरां अर दफतरां मांय सोहवणी सजावट करी ज्यी है अर लोग नुवा कपड़ा, जेवर, बर्तन, इलेक्ट्रॉनिक सामान अर सजावटी चीजां री खरीदी करण लाग्या हैं दीवाळी रे मौके मोटरगाड़ियां री ई खूब बिक्री व्हे रही है अर लोगों ने जीएसटी बचत उत्सव रो फायदो मिल रह्यो हैं

000

दौसा री जेल मांय ई दीवाळी श्यालावास विशेष केंद्रीय कारागार रा बंदी पर्यावरण-अनुकूल दीपक बणा रह्या हैं जेल अधीक्षक पारस जांगीड़ बतायो के बंदी मिट्टी अर गोबर काम ले र पारंपरिक दीया बणा रह्या हैं वे कह्यो के दीवाळी रे दिन जेल रा आंगणा मांय अ ही दीया जोया जावेला, जो कैदियां री मेहनत रो मान व्हेलां जेल प्रशासन रे मुजब इण रो मकसद कैदियां मांय सकारात्मकता, काम करण री लगन अर कलात्मकता ने बधावो देवणो हैं

000

आवता दिनां मनाया जावण वाळा दीवाळी अर दूजा त्यौहारां ने ध्यान राखता थकां पाली ज़िला रा तखतगढ़ मांय नगरपालिका री ओर ऊं लाय बुझावण री मॉक ड्रिल करी ज्यीं ई दौरान दमकल गाड़ियां रो रख-रखाव तैय करण सागे ई कर्मचारियां ने सिखावण दीरीजीं सवाईमाधोपुर रा सरकारी अस्पताल मांय ई लाय बुझावण रो अभ्यास करी ज्यो ज़िला कलेक्टर काना राम बतायो के ई अभ्यास मांय पुलिस, प्रशासन अर दमकल समेत न्यारा-न्यारा महकमां री तैयारियां री परख करी ज्यीं

000

बालोतरा पुलिस फर्जी सिम कार्ड रो काम करण वाळा दस जणा ने पकड़्या हैं एस.पी. रमेश बतायो के आरोपितां माथे बालोतरा मांय करीब बारह हजार अर आखा राज्य मांय पचास हजार ऊं बत्ता फर्जी सिम कार्ड बेचण रो आरोप हैं वे जनता ऊं वां रा नाम माथे जारी करी ज्या सिम कार्ड री जाणकारी हासिल करण सारु कह्यो है, ताकि किण ई भांत री दगाबाजी ऊं बच्यो जा सकें

.....

000

पत्र सूचना कार्यालय अर केंद्रीय संचार ब्यूरो री ओर ऊं आज जयपुर मांय केन्द्रीय सदन कने **‘विशेष स्वच्छता अभियान 5.0’** रा तैत नुक्कड़ नाटक राख्यी ज्यो अपर महानिदेशक ऋतु शुक्ला बतायो के नुक्कड़ नाटक रो मकसद लोगां मांय साफ-सफाई राखण रा बारा जाग जगावण, खुल्या मांय कचरो नी फेंकण अर सिगल-यूज प्लास्टिक काम नी लेवण री सीख देवणो हों

000

डूंगरपुर मांय आज जिला रोजगार कार्यालय री ओर ऊं नौजवानां ने नौकरी देवण रो शिविर लगायी ज्यो ज़िला रोजगार अधिकारी अमित शर्मा बतायो के शिविर मांय 47 उम्मीदवार नौकरी सारु चुणी ज्यां

000